



Mob Hnoos Qhuav (Pertussis) (Hnoos Hawb Pob/Whooping Cough)

Disease Fact Sheet

Mob Hnoos Qhuav yog dab tsi?

Mob Hnoos qhuav yog ib hom kab mob uas kis tau zoo heev uas ua mob rau hauv txoj hlab pas ua pa.

Leej twg thiaj kis tau tus mob hnoos qhuav no?

Tus mob hnoos qhuav no raug tau rau txhua tus neeg tsis hais hnuv nyoog li cas. Nws yuav raug hnyav heev dua rau cov me nyuam mos liab thiab cov me nyuam tseem me.

Tus mob hnoos qhuav no kis tau li cas?

Tus mob kis tau los ntawm cov pa tshuab tawm thaum tus neeg muaj tus mob hnoos. Qhov kheev kis tau yog tshwm sim los ntawm qhov nyob ua ke ntaus heev hauv tsev. Qhov sib kis ntawm cov neeg hauv ib tsev neeg yog ib qho kheev pom muaj ntau dua.

Cov cim thiab cov tsos mob ntawm tus mob hnoos qhuav zoo li cas?

Nyob rau ntawm cov me nyuam mos liab thiab me nyuam tseem me, tus mob yuav pib zoo li tau khaub thuas thiab los ntswg, tej zaum ces kub tob hau me ntsis thiab hnoos me ntsis mus li ib rau ob lis piam. Tus mob yuav hnyav zuj zus mus ua rau hnoos heev uas rau ua tsis tshua taus pa, noj tsis taus thiab pw tsis taus thiab tom qab ntawd kheev ua rau ntuav thiab lub cev tsis muaj ib lub zog tag nrho. Tom qab hnoos tas, cov neeg mob ntawd yuav ua pa hawb heev zoo li pheej sib zog nqus kom tau pa (uas muaj lub npe sawv daws keev hu tias yog "hawb pob"). Qhov hnoos heev heev yuav siv sij hawm mus li ob peb lub lis piam mus txog ob lub hlis los yog ntev tshaj no. Nyob rau ntawm cov me nyuam loj zog, cov hluas thiab cov laus, cov cim thiab cov tsos mob yuav sib zog thiab tsis tshua muaj qhov hawb heev heev.

Dab tsi yog cov teeb meem uas yuav muaj nrog rau tus mob hnoos qhuav?

Nyob rau ntawm cov me nyuam mos liab tsis tau muaj 6 hli, qhov pom ntau ces yog tau tus kab mob txheem dej rau hauv lub ntsws, ces tom qab ntawd yuav ua mob rau cov leeg xws li mob nriaj tes nriaj taw thiab ua mob rau cov paj hlwb. Thaj tsam li ib nrab ntawm cov me nyuam mos uas paub tias tau tus mob hnoos qhuav raug mus pw hauv tsev kho mob.

Ntev npaum li cas cov tsos mob mam tshwm tom qab kis tau tus mob?

Cov tsos mob kheev tshwm li ntawm 7-20 hnuv tom qab kis tau tus mob, tab sis kuj tshwm sim tau ntxov dua li 5 hnuv thiab ntev mus txog li ntawm 21 hnuv tom qab kis tau tus mob.

Thaum twg thiab yuav ntev npaum li cas tus neeg mob thiaj kis tau tus mob rau lwm tus?

Mob hnoos qhuav yog ib tug mob kis tau zoo tshaj thaum lub sij hawm tseem nyuam qhuav pib tau tus mob, ua ntej qhov hnoos heev heev. Kev kis ntawm tus kab mob rau lwm tus ua rau tau tus mob hnoos qhuav yuav tshwm sim ntev txog peb lub lis piam los yog ntau tshaj tom qab pib hnoos lawm. Lub sij hawm kis tau yuav muab txo tau kom luv dua mus txog 5 hnuv tom qab pib noj tshuaj tua kab mob thaum ntxov uas nyuam qhuav pib mob.

Puas muaj kev kho tau tus mob hnoos qhuav?

Nws muaj 4 hom tshuaj tua kab mob uas tau pom zoo kom muab siv kho tus mob hnoos qhuav uas yuav txo tau lub sij hawm sib kis mob kom luv. Cov kws kho mob yuav xaiv ib hom ntawm cov tshuaj no los kho tus mob. Hom tshuaj tua kab mob yuav muaj xws li cov azithromycin uas noj mus 5-hnuv, noj hom clarithromycin mus 7 hnuv los yog 14 hnuv rau hom erythromycin los yog



trimethromycin/sulfamethoxazole (TMP/SMX). Yuav tau muab cov neeg mob hnoos qhuav tshem tawm hauv tsev kawm ntawv, chaw ua hauj lwm los yog lwm yam qhov chaw kom txog rau thaum lawv tau siv txog li 5 hnuv ntawm ib hom tshuaj tua kab mob lawm. Ces mam noj cov tshuaj tua kab mob uas tseem tshuav raws nraim li kws kho mob hais kom noj.

Yuav ua li cas thiaj tiv thaiv tau tus mob hnoos qhuav kom txhob kis?

Tom qab paub tias muaj ib tug neeg tau tus mob lawm, yuav tau tsom kwm taug qab xyuas nws kom zoo mus txog 21 hnuv seb puas pom muaj cov tsos mob los yog noj tshuaj tua kab mob los mus tiv thaiv kom tus mob tsis txhob huam tuaj. Tam sim no, kev siv tshuaj tua kab mob los kho tus mob yog tsom rau cov uas nyob ua ke hauv ib lub tsev, cov uas nyob ze ua ke es muaj feem yuav kis tau tus mob sai tshaj (xws li cov me nyuam mos liab tsis tau muaj 1 xyoos), thiab cov uas yuav kis tau tus kab mob ua rau muaj tus mob hnoos qhuav rau cov yuav kis tau tus mob hanyav yooj yim (xws li cov poj niam cev xeeb muaj me nyuam muaj rau lub hlis rov saud lawm). Ib tug neeg twg uas nyob ze lwm tus uas pom muaj cov tsos mob ntawm tus mob hnoos qhuav yuav tau muab kuaj rau tus mob hnoos qhuav thiab muab cov tshuaj tua kab mob los kho tus mob.

Li cas thiaj paub tseeb hais tias yog mob hnoos qhuav?

Qhov yuav paub tseeb ces yog muab qhov kev tshuaj ntsuam hu ua polymerase chain reaction (PCR) los yog muab pas rwb mus tub hauv qhov ntswg koj mus kuaj thaum nyuam qhuav pib mob. PCR yog txoj kev kuaj sim kom paub tias yog mob hnoos qhuav.

Yuav ua li cas thiaj tiv thaiv tau tus mob hnoos qhuav?

Kev txhaj hom tshuaj acellular pertussis (aP) rau cov mos liab thiab cov me nyuam thaum hnuv nyoog 2, 4, 6 thiab 15 mus rau 18 hli thiab ib koob thaum hnuv nyoog 4 mus rau 6 xyoo. Nws yog muab nrog cov tshuaj txhaj mob qa foob (diphtheria) thiab mob kab xeb (tetanus) hu ua DTaP. Kev tiv thaiv tau tus mob tom qab txhaj tshuaj aP tsis yog yuav kav tas mus lub neej, tab sis ua hauj lwm zoo heev mus ntau xyoo tom qab txhaj tshuaj. Cov neeg uas tau tus mob hnoos qhuav tom qab txhaj cov tshuaj tawm tsam tus mob hnoos qhuav kuj yuav mob tsis heev npaum li cov uas yeej tsis tau txhaj tshuaj tawm tsam tus mob hnoos qhuav li. Txij thaum 2006 los mus, hom tshuaj txhaj rau tus mob hnoos qhuav rau cov hluas thiab cov muaj hnuv nyoog, hu ua Tdap, tau pom zoo kom muab txhaj li ib zaug ntxiv rau thaum muaj 11 los yog 12 xyoos. Cov hluas thiab cov muaj hnuv nyoog uas yeej tsis tau txhaj Tdap li yuav tau txhaj ib koob Tdap kom sai li sai tau. Kom tiv thaiv tau tus mob hnoos qhuav txhob kis rau cov nyuam qhuav yug los tshiab, cov poj niam cev xeeb muaj me nyuam yuav tau txhaj ib koob Tdap thaum cev xeeb muaj me nyuam txhua zaus, zoo tshaj mas yog thaum muaj 27 lub lis pam mus rau 36 lub lis piam.

Yog twb raug tus mob hnoos qhuav yav tas los lawm puas yuav ua rau ib tug neeg tiv thaiv tau tsis raug tus mob lawm?

Qhov paub tseeb tias raug tus mob hnoos qhuav los lawm kuj yuav tiv thaiv tau kom txhob raug ntxiv lawm. Tab sis li cas los, kuj tsis paub hais tias qhov tiv thaiv (immunity) ntawm lub cev los ntawm qhov tau tus mob yav tas los yuav mus tau ntev npaum cas.